



# QUÆSTIO MEDICA

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORVM,

Die Jovis 18. Decembris,

M. GUIDONE PATIN,

DOCTORE MEDICO, ET PROFESSORE  
REGIO, PRÆSIDE.

*An sanguis per omnes corporis venas & arterias jugiter  
circumfertur?*

I.

**Q**UOD vivimus calori tribuendum; quod aliquandiu, nutritioni, quâ Natura dum perpetuò sarcit quod continenter defluit, vitam quidem efficit longulam, non tamen æternam. Ad id operis nihil habet accommodatius sanguine, cujus materia chylus est, qui in ore gulâque inchoatus, & in ventriculo perfectus, in iis per quas ad jecur contendit venis, aliqua jam sanguinis specie ornatus, ipsius jecoris ipsi sese exhibentis propriâ innatâque vi, totam germani sanguinis formam induit. Inde tamen lapsus in Cavam aliasque insignes ve-

nas tergetur, nitetque magis. His quippe claudi omnino amat, si sibi relinquatur, nusquam egressurus. Sed mox ut suo parenti gravis, eò depulsus est, rapitur ab aliis partibus, illo suam expleturis famem. In venis itaque movetur, non ad modum procurrentis fluminis, sed perquam lentè, eoque dumtaxat gradu, quo is abit, cui succedit vicarius.

## I I.

**S**ANGUINEM perpetuò in orbem agi, è Cava ascende in dextrum Cordis specum delabi, inde egressum in universam pulmonis substantiam excurrere, hinc per venosam arteriam ad lævum Cordis sinum iter reflectere, unde in Aortam reliquasque arterias, & ab his in venas trudatur, in Cor jugi circuitu recursurus, suave est Harvæi somniantis, aut certe ingeniose ludentis commentum, nulla oculorum fide commendatum (quis enim operantem vidit Naturam?) nullis certis experimentis, nullo rationum pondere stabilitum. Nam quòd venæ inferiores, vinculo sanguinis fundendi causa injecto, præter morem tumeant, facit allata membro vis, dolorique comes constrictio, non qui in illis restitit interceptus sanguis. Et apertâ majori arteriâ, totus quidem etiam è venis excidit sanguis, quòd per hiantia coëuntium passim venarum & arteriarum oscula transfusus, vel suo pondere, vel spirituum, vel Naturæ vacuum omni corpore locum exhorrescentis impulsu excidat. Nihilo plus habent firmamenti quæ occurrunt in venis Valvulæ, quibus veluti per substratos dispositosque gradus sanguinem scandere, tum ne subito deorsum ruat, sufflaminari prædicant.

## I I I.

**S**ANGUINIS circuitio, & in orbem per vasa omnia circumductio, otiosarum mentium partus, mera nubes est, quam amplexantur Ixiones, Centauros & portenta procreaturi: Mirum quippe quantum hoc uno figmento universa viventium corporum Oeconomia obscuretur, perturbetur, quàm artis Medicæ fundamenta misere convellantur: Quàm Medicus principum præsidiorum subsidiis destitutus, inutilis sit, & feriatu afflictae opemque implorantis Naturæ spectator, quantum vel prudenti illorum usu mali importet. Non desunt tamen qui tam futili opinione delectati, ad eam tanquam ad

saxum pertinaciter adhærescant , cæcitatique antiquitatem insimulent. Qui si ad aspiciendam lucem oculos tantisper aperiant , facillimè cum errorem , quem rei novitas attulit , Naturæ ratione depellent.

## I V.

**S**ANGUINEM toto corpore circumferri , adeo Naturæ instituto adversatur , ut assiduo isto motu universa nutritionis ratio evertatur , damnaque gravissima incurran- tur. Nam si è sanguinis in venis reconditi penu semper aliquid demitur , ad id sarcindum , quod è singulis excidit partibus : cum hæ ad suum opus explendum aliquid sibi deposcant tem- poris spatium : sanguis vero simul accedat , & recedat , nul- libi moram faciat , quo tandem pacto ad vitam hæreere , in il- larumque substantiam abire & converti poterit ? Rem pro- prius intuere , non modo inutilem esse , sed more publicanorum molestam , & semper aliquid bonæ rei auferentem deprehen- des. Hæc quippe est fluentium corporum natura & ratio , ut quemadmodum amnis quantumvis taciturnus mordet rodit- que paulatim alvei sui ripas , ramenta quædam abripiant , & summo saltem vulnere degustent , quæcumque lambunt cor- pora , perenni detrimento tandem aliquando casura. Finge autem non jam à qualibet parte sanguinem amore quodam , sui que tutandi causa & necessitate delectum prolici : sed à Cor- de pulsus vage currere , quæ pars eo inundante aut expers erit phlegmones , aut ejus quasi pabuli uberioris appulsu non obruetur ?

## V.

**F**AMOSUM fumosumque hoc dogma quanta in corpo- rum natura , tanta in Arte Medica sequitur perturbatio , rerumque omnium confusio. Nihil enim amplius est in sangui- nis missione præsidij , nihil in purgatione , quin illa corpus ipsum accendi , hæc verò inquinari penèque venenari consequens est , nempe cum à fuso sanguine , qui in venis superest , mole co- piæque minor sit ; & celerius moveatur , motuque ipso incan- descat : & Cordis cava , sedem focumque luculenti caloris , sepius subeundo , novum calorem induat necesse est. Qui au- tem prius quasi sopiti vasorum tunicis adhærescebant fœdi humores , ubi purgantis medicamenti operâ emoti , cursum-

que præterlabentis sanguinis <sup>4</sup>sequuti in Cordis penetralia deducuntur, & ipsum inquinabunt, & similem reliquis subinde partibus labem importabunt: Sicque Medicis omni præstanti auxilio destitutis, morbisque ipsis, quos vel sanguinis fervor, vel humorum impuritas peperit, impune grassantibus, quam maxima mortalium strages edetur.

*Non ergo sanguis per omnes corporis venas & arterias jugiter circumfertur.*

### DOMINI DOCTORES DISPUTATURI.

*M. Franciscus Sorand,  
M. Iacobus le Menestrel,  
M. Carolus Brisset.*

*M. Nicolaus Bonvarlet.  
M. Nicolaus Rainssant.  
M. Ioannes Grouet.*

*M. Antonius Morand.  
M. Ioannes Hamon.  
M. Simon Boulor.*

Proponebat Lutetiæ JOANNES CORDELLE,  
Hamus, A. R. S. H. MDCLXX.

---

PARISIIS,

Ex Typographia FRANCISCI MUGUET, Regis &  
Illustrissimi Archiepiscopi Typographi,  
viâ Citharæ.